



NAHLA

CENTAR ZA EDUKACIJU I ISTRAŽIVANJE
CENTER FOR EDUCATION AND RESEARCH

Bilten

Godina I, broj 1

Periodični bilten Centra za edukaciju i istraživanje „Nahla“, Sarajevo



UVODNA RIJEČ


Uz prvi broj našeg biltena želimo izraziti svoju zahvalnost što ste uz nas, jer zbog vas postojimo, za zajedničko dobro radimo i ništa od naših zamisli ne bi se moglo pretvoriti u ostvarenja bez vaše podrške.

Putem našeg portala, FB stranica, newslettera te brojnih drugih komunikacijskih sredstava imate priliku pratiti informacije i dobijati obavijesti o onome što je u pripremi, aktuelnim upisima, kampanjama koje su u toku, konkursima i pozivima. Bilten će u tom smislu biti novina jer vas putem njega periodično želimo izvijestiti o onome što je urađeno, rezultatima koji su postignuti, aktivnostima koje su možda prošle nezapaženo ili bile manje medijski zastupljene, ali i ishodima naših poziva koji su upućivani prema vama te time završiti započetu priču i dati vam povratnu informaciju o nekim zanimljivostima i ostvarenjima u kvartalu na koji će se bilten odnositi.

Nadamo se da će vam Bilten dati i bolji uvid u brojne paralelne aktivnosti koje ovaj Centar realizira na različitim nivoima u borbi za promociju obrazovanja, civilnog društva, žene i njenog osnaživanja za aktivnije učešće u društvenim procesima kao i borbi za vladavinu prava i protiv svih oblika diskriminacije.

Za sada, Biltenom planiramo obuhvatiti zanimljivosti i programe koji se odnose na centar u Sarajevu, a nadamo se da ćemo vas uskoro obradovati i uspjesima i postignućima naših centara u Bihaću i Tuzli. Vaše pohvale i kritike, prijedlozi i preporuke, analize i evaluacije, dobrovoljni angažmani i zagovaranja ka zajedničkim ciljevima za nas su najvredniji pokazatelji kamo idemo i kako da nastavimo dalje.

Nadamo se da će bilten biti još jedan korak ka produbljivanju međusobnog povjerenja i kvaliteta naše komunikacije kroz sve ove procese, kako bismo zajednički postigli još bolje rezultate i vratili povjerenje da se u ovome društvu može desiti promjena nabolje, da u nju treba vjerovati i za nju raditi.



Sehija Dedović
direktorica CEI Nahla

NAHLA U REGISTRU ORGANIZATORA OBRAZOVANJA ODRASLIH!

Prema novoj zakonskoj regulativi, obrazovanje odraslih u Kantonu Sarajevo, kao svoju redovnu djelatnost ili kao djelatnost koja prati redovnu mogu provoditi jedino ustanove koje imaju odobrenje Ministarstva obrazovanja za realizaciju programa obrazovanja odraslih, odnosno rješenje o ispunjenosti uvjeta za izvođenje programa obrazovanja odraslih. CEI „Nahla“ je u decembru 2017. godine zvanično postala jedna od tri organizacije koje su dosada upisane u Registar organizatora obrazovanja odraslih pri Ministarstvu za obrazovanje, nauku i mlade Kantona Sarajevo. Kao organizacija čija je glavna djelatnost lično i profesionalno

osposobljavanje i osnaživanje žena kroz različite programe obrazovanja odraslih od 2000. godine, podržali smo pozitivne procese u ovoj oblasti i smatramo da sadrži bogat potencijal za podsticanje i modeliranje individualnog razvoja svakog pojedinca, a time i društva u cjelini. Svoj doprinos obrazovanju odraslih dajemo kroz preko 40 različitih oblika edukativnih programa koje godišnje u Sarajevu pohađa preko 8.000 žena, u dobi od 15 do 45 godina života. CEI „Nahla“ u narednom periodu planira započeti proces akreditiranja svojih obuka za zapošljavanje i samozapošljavanje kao javno važećih i uskladiti ih sa standardima i propisima koje predviđa Zakon o obrazovanju odraslih.

POTPISAN SPORAZUM O SARADNJI VIJEĆA MINISTARA BIH I NVO

Zajedno s predstavnicima više od 70 nevladinih organizacija iz BiH CEI Nahla je 30. novembra 2017. godine potpisala Sporazum o saradnji Vijeća ministara BiH i nevladinih organizacija u BiH. Potpisivanju su prisustvovali predsjedavajući Vijeća ministara Denis Zvizdić, šef Delegacije EU u BiH i specijalni predstavnik EU u BiH Lars-Gunnar Wigemark i ambasadorica Sjedinjenih Američkih Država u BiH Maureen Cormack. Potpisnici sporazuma obavezali su se da će posvetiti sve svoje kapacitete izgradnji prosperitetnog, pravičnog, otvorenog, pluralnog i demokratskog društva u našoj zemlji. Sporazumom se nastoji kreirati nužni politički okvir za jačanje učesničke demokratije, što korespondira sa zahtjevima EU i potrebama Bosne i Hercegovine za transparentno kreiranje i provođenje javnih politika u

nadležnosti Vijeća ministara usmjerenih na poboljšanje uvjeta života i rješavanje problema njenih građana.



NOVOSTI IZ ODJELA ZA EDUKACIJU

S NAHLOM DO AKTIVNOG KORIŠTENJA STRANIH JEZIKA!

Nahla je i u ovoj poslovnoj godini omogućila polaznicama da pohađaju kurseve stranih jezika po pristupačnim cijenama, organizirane po metodologiji obrazovanja odraslih, da uspješno uče strane jezike i aktivno ih koriste u svakodnevnoj i poslovnoj komunikaciji. U jesenjem ciklusu od oktobra do decembra realizirani su kursevi engleskog, njemačkog i turskog jezika. Ukupno 79 polaznica kroz zanimljiv nastavni program i ugodnu atmosferu stekle su novo znanje, te dobile priliku da kroz brojne konverzijske vježbe i radionice razviju samopouzdanje u aktivnom korištenju stranih jezika.



BRZO I KVALITETNO USVAJANJE IT VJEŠTINA



IT programi u Nahli i ove godine plijene pažnju polaznica, zbog prilike da u roku od mjesec dana i za prihvatljivu cijenu nauče efikasno koristiti različite softvere, kao što su Photoshop, Excel i drugi. Ukupno 31 polaznica uspješno je završila IT kurseve u jesenjem ciklusu. Pripremni kurs za IT certifikat je novina u našoj ponudi, a nastao je kao odgovor na potrebu korisnica za jednom kratkom i sistematičnom edukacijom kroz koju će se upoznati s osnovama rada na računar u neophodnim na tržištu rada.

PROTIV STRESA UZ NAHLINE KREATIVNE RADIONICE

Na kreativnim radionicama nastavljamo obarati rekorde posjećenosti. Gotovo 200 polaznica uživalo je u stjecanju znanja iz oblasti šivenja, fotografije i slikanja na alu-foliji. Polaznice su imale priliku učiti različite vještine od stručnih i profesionalnih predavačica i u ugodnoj i prijateljskoj atmosferi izraziti svoju kreativnost. Nahline kreativne radionice, pored toga što nude okruženje u kojem se polaznice mogu odmoriti i osloboditi od stresa, omogućavaju ženama da kroz stjecanje novih vještina dobiju priliku za ekonomsku zaradu ili samozapošljavanje.



PODRŠKA ŽENAMA U RAZVOJU BIZNISA!

U ponedjeljak, 6.12.2017. održana je svečana dodjela certifikata i dodijeljena nagrada za najbolji biznis plan u okviru projekta „Akademija ženskog poduzetništva - Podrška ženama u razvoju biznisa“ koji je CEI „Nahla“ realizirala uz partnersku podršku organizacije DVV International - Ured za BiH.



Na samom početku projekta kandidatkinje su predstavile ideje iz različitih privrednih djelatnosti: od izrade nakita, suvenira, proizvodnje predmeta od drveta, preko pružanja usluga čišćenja poslovnih i stambenih prostora i dr., koje su u toku četveromjesečne obuke unaprijeđene i prilagođene za opstanak na realnom tržištu.

Obuka je obuhvatila ukupno 120 sati praktične i teoretske nastave iz osam različitih oblasti: poduzetništvo, liderstvo, pravni okvir biznisa, finansijski okvir, marketing, prodaja i prodajni menadžment, komunikacijske vještine i biznis plan.

Po završetku obuke sve učesnice su pristupile izradi finalnih biznis planova za svoje poslovne ideje, a njihova sveobuhvatnost, tačnost i primjenjivost dokazala je da je svih 15 polaznica uspješno završilo obuku i manje ili više su spremne za ulazak na tržišta definirana izrađenim poslovnim planovima.

Nagradu za najbolji biznis plan, novčanu podršku u iznosu od 2.000 KM za pokretanje biznisa, osvojila je Silvija Fejzagić s poslovnom idejom osnivanja obrta za obradu i proizvodnju proizvoda od drveta „Duborez CNC“. Gospođa Fejzagić je u svom obraćanju istakla značaj realizovane obuke kako za profesionalni tako i za lični razvoj budući da nikada nije bila zaposlena i da joj je ova obuka pomogla da ostvari svoj san i preuzme aktivnu ulogu u kreiranju bolje budućnosti svoje porodice.



Drugo mjesto osvojila je Sanja Delić Bradić s poslovnom idejom osnivanja udruženja za edukaciju i razvoj kreativnosti „Volimo učiti kreativno“, dok je treće mjesto osvojila Lejla Tuzlak s poslovnom idejom pokretanja obrta za ozonizaciju prostora i zraka ozonom „ČISTO3“.

NAHLINA POSLOVNA ZAJEDNICA - U NOVE POBJEDE S DRUŠTVENO ODGOVORNIM PARTNERIMA!

U nastojanju da brže utječemo na pokretanje pozitivnih promjena i smanjimo stepen nezaposlenosti u našem društvu, odlučili smo

udružiti snage s kompanijama koje u svom poslovanju promoviraju koncept društvene odgovornosti. Društveno odgovorno djelovanje naših partnera odnosi se na pružanje podrške našem centru pri realizaciji aktivnosti koje potiču procese zapošljavanja i samozapošljavanja.



Svojom podrškom u vidu mentoringa, pružanja prilika za obavljanje prakse, stalnog ili honorarnog angažiranja polaznica obuka, finansijske podrške poslovnim idejama naših korisnica te drugim vidovima društveno angažiranog djelovanja naši društveno odgovorni partneri u velikoj mjeri doprinose poboljšanju kvaliteta života korisnica usluga CEI Nahla, kao i razvoju društva u cjelini.

Našoj mreži društveno odgovornih partnera u prethodnom periodu pridružili su se: Klas, Imtec, Swiss contact, Čip sistemi, Hobby art centar, fondacija Big Mev, Sinkro, agencija Monloe, portal Akta.ba, agencija Mašta, agencija Digital2, Studio Zidovi...

DELEGACIJA IZ TURSKE POSJETILA NAHLU



U utorak 17. oktobra 2017. godine CEI „Nahla“ posjetili su predstavnici DVV International i njihovih partnerskih organizacija iz Turske. Cilj posjete bilo je upoznavanje sa sedamnaestogodišnjim uspješnim radom Nahle, s izazovima i pozitivnim praksama kad je u pitanju edukacija i zapošljavanje žena. Poseban naglasak bio je na smjernicama u radu na psihološkom osnaživanju žena budući da se predstavnici iz Turske suočavaju s izazovima u radu sa ženama izbjeglicama iz Sirije.

Posjeta je doprinijela razumijevanju istih ili sličnih izazova u edukaciji i osnaživanju žena s aspekta kulturološke različitosti i otvorila vrata međusobne saradnje.

NAHLA NA OSCE KONFERENCIJI U BEČU

Povodom desetogodišnjice održavanja prve OSCE međunarodne konferencije o netoleranciji i diskriminaciji prema muslimanima 18. oktobra 2017. u Beču je održana konferencija pod nazivom „Borba protiv netolerancije, diskriminacije i mržnje prema muslimanima: Ka sveobuhvatnoj reakciji u OSCE regiji” s ciljem procjene napretka država članica OSCE-a u borbi protiv netolerancije prema muslimanima.



Na prvoj konferenciji održanoj u Kordobi 2007. godine pod pokroviteljstvom predsjedavajuće OSCE-a, Španije **usvojena je Deklaracija o netoleranciji i diskriminaciji prema muslimanima** koja je istakla izazove vezane za pojave netrpeljivosti prema muslimanima u OSCE regionu i tom prilikom su države članice OSCE-a preuzele odgovornost za rješavanje ovog problema.

Države članice OSCE-a su se obavezale da će donijeti sveobuhvatni set mjera protiv netolerancije i zločina iz mržnje prema muslimanima, realizirati edukativne aktivnosti za podizanje svijesti o netrpeljivosti prema muslimanima i promovirati toleranciju i nediskriminaciju. Konferencija u Beču razmatrala je kako se ovi problemi adresiraju i sagledala ih u svjetlu novih izazova i načela poštivanja ljudskih prava i osnovnih sloboda.

Jedna od učesnica na konferenciji bila je i mr. Sehija Dedović, predstavnica Centra za edukaciju i istraživanje "Nahla", koja je dugi niz godina aktivna na polju zaštite i borbe za prava žena, podizanja svijesti i zaštite prava pojedinaca, borbe protiv svih oblika diskriminacije, netolerancije, govora mržnje, a posebno islamofobije, koja se sve češće manifestira u različitim oblicima i na različitim poljima.



100 SADNICA ZA NOVI ŽIVOT!

Sedamdeset članica i članova Nahlinog treking kluba, vodiči i dio tima CEI Nahla u subotu, 25. novembra 2017. sadnjom 100 sadnica jasena u Memorijalnoj šumi 8372, u blizini Goražda simbolično su obilježili Dan državnosti Bosne i Hercegovine.



tako smrča, jasen i divlja trešnja predstavljaju muškarce, žene i djecu ubijene tokom genocida u zaštićenoj zoni UN-a Srebrenici. Tu su i prateći sadržaji poput biciklističke i pješačke staze u obliku brojeva 8372 označene kao „Staza tišine“, putokazi, informativne table, klupe i vidikovac. Očekuje se da će s jesenjom sadnjom u Memorijalnoj šumi do zime biti oko 8.000 sadnica, te da će projekat biti završen na proljeće.

Povodom Dana državnosti Bosne i Hercegovine Nahlin treking klub organizirao je turu za sjećanje kojom su se članovi/ce Nahlinog treking kluba, vodiči i dio tima CEI Nahla priključili stotinama onih koji učešćem u ovom višestruko značajnom projektu nastoje sačuvati sjećanje na genocid u Srebrenici. Posadili su 100 sadnica jasena kao trajno i živo sjećanje na ubijene u Srebrenici, ali i kao podršku rađanju novog života.

Realizaciju projekta „Memorijalna šuma 8372“ u Posestri kod Goražda je iniciralo Muftijstvo goraždansko s ciljem trajnog čuvanja sjećanja na žrtve genocida u Srebrenici, kao najvećeg ratnog zločina počinjenog u Evropi nakon Drugog svjetskog rata. Projektu su dali podršku Vlada Bosansko-podrinjskog kantona Goražde i Općina Goražde, dok je idejni tvorac projekta JP „Bosanskopodrinjske šume“.

Smještena na 3,4 hektara u Posestri kod Goražda „Memorijalna šuma 8372“ je šumski kompleks pun simbolike. Centralni dio činit će cvijet sa 11 latica koji simbolizira 11. juli 1995. godine, a u šumi se sade tri vrste sadnica: smrča, jasen i divlja trešnja. Osim ukupnog broja i vrste sadnica imaju svoju simboliku, pa



NOVOSTI IZ NAHLINE LINIJE ZDRAVLJA

DARUJ KRV – SPASI ŽIVOT!

Centar za edukaciju i istraživanje „Nahla“ ima dugu tradiciju organiziranja akcija dobrovoljnog darivanja krvi, s ciljem uključenja u promociju vrijednosti i značaja čina davanja krvi kao dragocjene tečnosti koja spašava živote i animiranja građana/ki da se priključe akciji. U prostorijama Centra u saradnji sa Zavodom za transfuzijsku medicinu FBiH u srijedu, 27. septembra od 16h do 19h organizirana je još jedna akcija dobrovoljnog darivanja krvi, a u toku tri sata koliko je akcija trajala, tim za transfuzijsku medicinu FBiH je registrovao ukupno 32 zainteresiranih davalaca/davateljki krvi.



OBILJEŽEN DAN MENTALNOG ZDRAVLJA



Povodom 10. oktobra, Svjetskog dana mentalnog zdravlja, u četvrtak 12. oktobra u prostorijama Centra održana je tribina "Sezonska depresija". Svjetski dan mentalnog zdravlja obilježava se s ciljem podizanja svijesti o važnosti mentalnog zdravlja i ulaganja u mentalno zdravlje. Podaci Svjetske zdravstvene organizacije ističu depresiju kao jednu od vodećih uzroka bolesti i invaliditeta u svijetu koja sa sobom često nosi manjak produktivnosti pa i nemoći za rad.

Azra Ibrahimović, voditeljica Nahlinog psihološkog savjetovališta, upoznala je prisutne s najbitnijim činjenicama vezanim za depresiju: simptomima, vrstama depresije i razlikama između njih, načinima na koje možemo sebi pomoći i znakovima koji upućuju na to da trebamo zatražiti profesionalnu pomoć.

ZNANJEM PROMIJENIMO STATISTIKU!



Povodom obilježavanja mjeseca borbe protiv karcinoma dojke Nahlina linija zdravlja je u četvrtak, 26. oktobra 2017. organizovala predavanja „Znanjem promijenimo statistiku“ na kojem je dr. sci. spec. interne medicine, Amina Godinjak, govorila o najčešćim malignim oboljenjima koja pogađaju žene, s fokusom na karcinomu dojke kao najčešćem uzrok smrti žena od malignih bolesti i najčešćem pojedinačnom uzroku smrti žena u FBiH. Doktorica je istakla da su jedini načini smanjenja smrtnosti od ove opake bolesti: razvijanje svijesti o potrebi aktivne brige pojedinca o svom zdravlju, usvajanje zdravih promjena u ishrani i životnom stilu i zdravstvena edukacija – povećanje znanja o dostupnim dijagnostičkim metodama skrininga za ranu detekciju i redovni i permanentni samopregled.

PRAVILNO KUHANJE - ZDRAV ŽIVOT!

U subotu 28. oktobra 2017. godine završena je treća po redu Nahlina škola kuhanja “Pravilno kuhanje - zdrav život” koju je vodila dr. Safija Softić-Namas, voditeljica Nahlinog savjetovaništa o zdravoj ishrani. Škola je pokrenuta s ciljem podizanje svijesti o važnosti pravilne ishrane i promocije zdravih životnih stilova. Školu je pohađalo 16 polaznica koje su u četiri nastavka kroz teoretski i praktični dio imale priliku naučiti osnove pravilne ishrane i kuhanja.

Bilo mi je zadovoljstvo biti dio škole koja je uveliko promijenila i dalje mijenja moj način ishrane.

(polaznica škole kuhanja)



TIGNUMOV DAN OTVORENIH VRATA

Članice kluba mladih Tignum 8. oktobra su organizirale Dan otvorenih vrata gdje su predstavile aktivnosti kluba, te iskoristile priliku da kroz interaktivni i zabavan sadržaj okupe sve zainteresirane buduće članice. Tom prilikom djevojke su mogle popuniti i formular za prijavu i obaviti informativni razgovor s članicama i koordinatoricom kluba. Tokom ovog događaja, prisutni su imali priliku doprinijeti fondu za stipendiranje kupovinom slanih i slatkih delicija koje su donirale prijateljice Centra, potom saznati sve informacije o aktivnostima Nahle i kluba mladih, zabaviti se i osvojiti nagrade uz kviz i društvene igre, upoznati jednu mladu gluhu osobu i usvojiti osnove znakovnog jezika te naučiti kako kreirati CV u skladu sa zahtjevima tržišta. Dan otvorenih vrata je zaključen



koncertom pjesama poznatih kantautora u odličnoj izvedbi mladih, talentovanih muzičarki, Naide Šabović i Narcise Ramić.

ONE DOLAZE - NOVA GENERACIJA NAHLINOG KLUBA MLADIH

Nahla je od oktobra 2017. dobila 25 novih aktivistica koje su se pridružile klubu mladih "Tignum". Prvi susret je održan 29. oktobra 2017. godine, a prisutnima su dobrodošlicu poželjele Sehija Dedović, direktorica CEI Nahla, Azra Ibrahimović, zamjenica direktorice te Amina Šljivo Bečić koordinatorica programa za mlade.

Istaknuta je važnost uloge mladih u procesu promjena uz društvu i izgradnje kvalitetnijeg okruženja uz isticanje snage zajedništva i grupnog djelovanja.

Uvjereni da svako od nas može podučiti nekoga nečemu i da je Tignum siguran prostor za izgradnju i praktičnu primjenu vještina koje posjedujemo, radujemo se radu s



ovim motiviranim aktivisticama u naredne dvije godine kroz različite aktivnosti usmjerene na lično i profesionalno usavršavanje, izgradnju duhovnosti i realizaciju kampanja i inicijativa.



Krajem septembra 2017. godine održan je trodnevni teambuilding za članice kluba mladih Tignum iz tri grada – Sarajeva, Bihaća i Tuzle u planinarskom domu „Brezovača“. Prilika je iskorištena kako bi se djevojke iz ova tri grada bolje umrežile i razmijenile ideje o mogućim zajedničkim projektima u narednoj godini.

Tokom tri dana učesnice su s koordinatoricama i predavačicama prošle kroz različite radionice koje se tiču ličnog i profesionalnog usavršavanja kao i izgradnje duhovnosti – organiziranje inicijativa, postavljanje ciljeva, prepoznavanje vlastitih kompetencija i izgradnja samopouzdanja, potom predavanja o vjerom inspiriranom aktivizmu, ali i kreativne radionice poput izrade umnih mapa i rad u timu.

Organizirana je i projekcija dokumentarnog filma kao i druženje s rediteljicom, a boravak u prirodi je iskorišten i za istraživanje okoline i organiziranje trekking ture do vrha Golo Brdo, odakle se pruža pogled na Sarajevo.

Jako me raduje da sam stekla nove prijateljice iz Tuzle i Sarajeva, što sam do sada rijetko imala priliku, zbog udaljenosti Bihaća, te rijetko i posjećujem ove gradove. Motivirajuće bilo sresti djevojke s kojima dijelim poglede na život, a toliko različitih mišljenja i ideja koje su inspirisale za proaktivni angažman naredne godine. Usto, nije nedostajalo ni novih znanja, a ni zabave. Vrijeme provedeno ovdje je bilo u potpunosti ispunjeno, bez imalo prilike za dosadu. Definitivno iskustvo koje želim ponoviti.

(Elma Hodžić, Bihać)

MOŽEMO LI ZAJEDNO?



U srijedu 11. oktobra u prostorijama Nadbiskupijskog centra za pastoral mladih „Ivan Pavao II“ održano je predavanje pod nazivom „Možemo li zajedno?“, koje je jedna od aktivnosti koje se realiziraju u sklopu međureligijskog projekta „Koračajmo zajedno“. Na početku se prisutnima obratila koordinatorica projekta Nadežda Mojsilović, koja je najavila predavačice Aminu Šljivo Bečić, koordinatoricu programa za mlade u CEI Nahla i Teu Vuglec Mijović, katoličku teologinju i doktoranticu na Katoličkom bogoslovnom fakultetu u Zagrebu.

U svom izlaganju Amina se osvrnula na važnost volonterizma i aktivizma kao životnog stila mladih osoba, u cilju činjenja i širenja dobra. Također, ona je govorila o volontiranju koje je inspirirano vjerom, te kako kroz volonterski rad možemo dobiti priliku upoznati

ljude različitih vjeroispovijesti i etničkih pripadnosti te samo tako graditi stabilne zajednice, mir i progres, naglasivši da mladi uvijek trebaju uložiti svoj maksimalni trud, a da konačni rezultat prepuste Bogu.

O kvalitetu suživota i koje karakteristike pojedinac treba imati da bi mogao živjeti zajedno sa drugima, govorila je teologinja Tea, istaknuvši zrelost pojedinca, poštovanje i povjerenje prema drugoj osobi kao preduvjete za taj odnos. Ona je u svojoj prezentaciji definirala pojam identiteta i koje sve identitete osoba ima da bi bila potpuna osoba i da bi bila u mogućnosti graditi suživot. Po završetku izlaganja, prisutni su bili vrlo aktivni u diskusiji, postavljanju i odgovaranju na pitanja, te iznošenju svojih vlastitih iskustava kad je riječ o međuvjerskoj i međuetničkoj saradnji, suživotu i odnosu prema drugom i drugačijem.

AKTIVNOSTI POVODOM 16 DANA AKTIVIZMA PROTIV NASILJA NAD ŽENAMA

Povodom 16 dana aktivizma protiv nasilja nad ženama i Međunarodnog dana ljudskih prava CEI Nahla je od 25. novembra do 10. decembra organizirala niz aktivnosti u cilju suprotstavljanja svim oblicima nasilja u našem društvu. Željeli smo apelovati na svijest javnosti o sveprisutnom problemu nasilja, ograničavanja sloboda i kršenja prava u našem društvu i poslati poruku protiv rodnog, vjerskog, nacionalističkog, rasnog, vršnjačkog i svih drugih oblika nasilja koji narušavaju dostojanstvo čovjeka.

U okviru 16 dana aktivizma realizirane su sljedeće aktivnosti:

Radionica za mlade „Moje iskustvo s rodno zasnovanim nasiljem“ (26. novembar 2017), s fokusom na lična iskustva s rodno zasnovanim nasiljem i tematiziranje vjere kao važnog faktora u suzbijanju nasilja nad ženama.

Izložba fotografija "Mojih 1.000 riječi protiv nasilja" (4-10. decembar 2017) u Sarajevu i Bihaću, na kojoj je prikazano 16 odabranih fotografija od 50 pristiglih na Nahlin fotokonkurs iz cijele Bosne i Hercegovine. Fotografije možete pogledati [OVDJE](#).



Psihoedukativna tribina „Kako prepoznati nasilje u vezi ili braku, kako se suprotstaviti i kako zatražiti pomoć“ (7. decembar 2017). Psihologinja Aida Kuljanović-Mešić pomogle su prisutnima da poboljšaju kompetencije u prepoznavanju i suprotstavljanju prvim znakovima nasilja u partnerskoj vezi ili braku. U toku tribine članice Nahlinog kluba mladih Tignum izvele su kratki umjetnički performans o nasilju nad ženama.



